

Ibu bapa bantah kelas komputer



KEPONG - Ibu bapa murid Sekolah Jenis Kebangsaan Cina (SJKC) Desa Jaya, dekat sini tidak bersetuju dan membantah kelas komputer yang dianjurkan oleh pihak sekolah.

Ini kerana mereka mendakwa kelas komputer yang memperuntukkan masa lebih satu jam seminggu yang dimasukkan dalam jadual waktu kelas tidak perlu diteruskan kerana ia bukan merupakan mata pelajaran wajib yang ditetapkan Kementerian Pendidikan.

Tinjauan Sinar Harian menemui ibu bapa yang tidak berpuas hati dengan kelas komputer yang dianjurkan oleh pihak sekolah.

Menurut Alex Tong, 53, berkata, pada November 2008, ibu bapa pernah membantah dan membawa hal itu kepada pihak Jabatan Pelajaran Negeri Selangor (JPN) sebelum satu sesi mesyuarat diadakan bersama pihak JPN, Pejabat Pelajaran Daerah (PPD) Gombak dan Kementerian Pelajaran dan juga wakil ibu bapa.

"Sekolah itu tidak menjadikan peristiwa yang berlaku sebagai pengajaran apabila murid-murid tetap dikenakan bayaran RM100 untuk yuran komputer meskipun PPD Gombak telah mengarahkan pihak sekolah memberhentikan kelas komputer pada waktu jadual rasmi kerana melanggar peraturan sedia ada," katanya.

Eng Kim Meng, 43, berkata, pihaknya kesal kerana kelas komputer tidak lebih dari sekadar pembaziran kerana apa yang mustahak ialah subjek-subjek lain yang lebih penting.

Katanya, guru-guru pula diberi elaun khas 'datang awal' gara-gara kelas komputer ini.

Difahamkan, setiap komputer disewa dan bersama tenaga pengajarnya turut dibayar menggunakan wang kutipan RM 100. untuk setahun yang diperolehi oleh murid-murid yang keseluruhan berjumlah RM400,000 setiap kali kutipan dibuat.

Sementara itu Lim Kian Teak, 41, berkata, ibu bapa turut mempertikaikan ketelusan pihak sekolah apabila penyata kira-kira yang dibentangkan dalam Mesyuarat Agong Persatuan Ibu bapa dan Guru (PIBG) mengelirukan.

"Mereka hanya menyebut keseluruhan wang dibayar kepada syarikat yang mengendalikan kelas komputer tersebut berjumlah RM400,000 setahun dan daripada wang yang dibayar oleh murid-murid namun tidak ada baki yang tersimpan untuk kelas komputer itu semuanya habis digunakan untuk membuat pembayaran.

Hean Leong, 39, berkata, guru-guru juga dilihat gemar memperli dan mengugut murid yang tidak membayar yuran komputer.

"Ada murid diugut tidak akan diberi membuat pinjaman buku teks, didenda berdiri atas kerusi dan berdiri di koridor jika sekiranya mereka gagal menjelaskan bayaran yuran RM100 itu menyebabkan mereka tertekan," katanya.

Menurutnya, satu laporan polis telah dibuat berhubung insiden itu pada 19 Januari lalu di Balai Polis Desa Jaya.